

11. Maj 2017

**Brintiliornermut brintillu atorneqarnissaanut illoqarfinni imermit nukissiornermik pilersorneqartuni nukiup atorneqanngitsup atornissaanut Ilulissani misiliutaasumik suliniuteqarnissamut pilersaarummik Naalakkersuisut UPA 2018-imut saqqummiussinissamik peqquneqarnissaat pillugu Inatsisartut aalajangiiffigisassaattut siunnersuut.**

(Inatsisartuni ilaasortanit Debora Kleist, Anders Olsen, Vivian Motzfeldt, Bendt B. Kristiansen aamma Mala Høy Kùko)

Siullermik Siumumiit siunnersuuteqartut qutsavigaagut.

Brint nukissiuutitut ineriartortillugu nukimmik mingoqannginnerusumik pilersitsiniarluni isumaq ukiorpassuit ingerlavoq. Nunat allat qiviarutsigit, misissuinerit, misileraanerillu annertuut, pingaaruteqartullu, ilisimasaqarnerulernermik, aammalu nukiliorfissamik sanaartornikkut ineriartortitseqqinnissamut alloriarnerit tulliinut angusaqartartut pissanganarlutillu soqutiginarput.

Nunatsinni Inatsisartuni aamma Brinti pillugu oqallinneq ukiut siuliini annertuumik sammineqartarpoq, amerlanerpaatigullu soqutigineqarluni iluaqutaasinnaasutut oqallisigineqartarluni, aammalu nunatsinni pingaartumik Nukissiorfiit eqqarsaatigalugit misileraanertut taaneqarsinnaasumik ingerlataqarsimapput. Taamanikkullu iluatsinngitsutut nalilerneqarluni, aammalu piginnaasat immaqa eqqarsaatigalugit iluatsittoqarani.

Aappaatigut nunatsinni tamanna iluatsissimangimmat tupinnangilaq. Tassami nunani ilisimatarnikkut siuarsimasuni, suli aamma tamakkiisumik atorneqalinnngitsutut taaneqarsinnaavoq, suli annertunerusumik ilisimatusarnikkut pisariaqartitsisoqarnera oqaatigineqarpoq. Ukiumiillu ukiumut aningaasaliissutit amerlasuut illikarteqqaarlugit taamatut misileraaneq ilisimatusarnerlu anguneqarsinnaavoq.

Siumumiillu pingaartutut isigaarput, nunatsinni minguinnerusumik nukissiornikkut siuarsartuarluta ineriartortitsinissaq. Aammalu avatangiisitsinni nukiit pioreersut ineriartortillugillu atorluarnerisigut tamanna angujartuaarneqartussatut siunnerfiusariaqarpoq.

Siumumi isumaqarpugut, misileraanissanut aammalu suliniutip qanoq annertutigisinnaanerata ilusissaa paasissallugu pingaaruteqartoq. Aamma nunat allat misileraanikkut ingerlalluareersut peqatigalugit nunatsinni Brintiliorsinnaanermut ineriartortitsineq soqutiginarluinnartoq aalaakkaasumik pilersinneqarsinnaasoq.

Taamatut oqaaseqarluta, siunnersuuteqartunut qujalluta, innersuussutigissavarput, siunnersuut ataatsimiititaliamut susassaqtumut ingerlatinneqassasoq.

Knud Kristiansen  
Siumut.